

[Augsburg], 8. Mai 1570

An Joachim Camerarius d. Ä.

BSB, Clm 10370, Nr. 301.

Clarissimo viro, D. Ioachimo Camerario etc. Domino et amico suo colendo. Leipzig.
 S. Etsi filius tuus Ioachimus nuper mihi significauit, senectutem tuam et calculo et curis publicis affligi (quod sanè pro eo ac debeo, doleo) tamen literis doctissimis et suauissimis, quas ad Georgium Ludouicum Huttenum, adolescentem (quantum ex aspectu et vnius dieculae consuetudine iudicare licuit) generosae indolis, et dignum maioribus suis, dedisti, lectis, non parum recreatus sum: cum viderem et ingenij et corporis eum vigorem in te esse, qui vel iuueni sit optandus. Me ἐπὶ γήραος οὐδὲ ὄντα Circumsilit agmine facto Morborum genus omne. In primis vero λιθίασις καὶ αἰμουρία καὶ ἡ πολύοζος χειράγρα vexant. Sed quia ita tulit ἡ τῆς φύσεως δυσκρασία, et fortassis accessit ἡ τοῦ ἥθους ἀκρασία: ferendum non culpandum, quod mutari non potest. Haec scribo, quia aliud argumentum non occurrit: et scio humanitati tuae nugas meas esse non ingratas. Quid enim de republica dicam homo ἀπολίτευτος, et in umbra scholastica delitescens? ad te praesertim cui pleraque notissima sunt, tantoqüe maiorem afferunt dolorem, quantò longius in posterum prospicis. De pace Gallica, Petrus Ramus, qui superiore mense biduum mecum fuit, bene sperabat: sic tamen, vt se vereri diceret, ne, ciuali bello sopito, fraternum existeret: quod effaeminato regi frater, homo bellicosus, aequo animo non videretur obtemperaturus. Hugo autem Plocius I[uris] C[onsultus] vir doctiss[imus] et multarum rerum peritus, Hutteni nostri praeceptor, ea de aula Gallica referebat, quae sine dolore et indignatione audiri à nemine viro bono et cordato possent. Ita fit scilicet, vbi Rex puer est. Διαφέρει δ' οὐδὲν νέος τὴν ἡλικίαν, ἡ τὸ ἥθος νεαρός. Galli tamen, inter hos tumultus Demosthenem graecum nobis dederunt, quem nunc rogatu Episcopij, typographi mei, relegere cogor. Habet enim is sub praelo Demosthenem et Aeschinem, graecè Latineqüe à me accuratè, pro virili quidem mea, correctos, et annotationibus auctos: intra vnius anni spacium, vti spero, charta regia et typis elegantissimis edendos. Haec scripsi, Clarissime vir, Domine et amice colende, ne nihil scriberem, cum doctus hic iuuenis, Ionathas θεέπαινος, Stetinensis scholae rector, operam in perferendo suam offerret. Deus Opt[imus] Max[imus] incommoda valetudinis et aetatis clementer leuet, teqüe nobis et Musis quam diutissimè conseruet. Vale. postridie Nonas Maij 1570.

Hieronymus Wolfius
tui obseruantissimus.